

現代生活藝術系列

華嚴經疏論纂要 45

— 升兜率天宮品之二 —

華藏淨宗學會印贈

大方廣佛華嚴經疏論纂要卷第四十五

五臺山清涼國師澄觀疏鈔

太原方山長者李通玄 論

閩鼓山私淑比丘道需纂要

升兜率天宮品第二十三

之二

○第六明不可轉法。卽觀察如來降伏一切外道功德。由有上能治故。他不能轉利有情事故。次明之。謂教證二法。皆不爲他所動轉故。無有餘法勝過此故。

善能開演種種文句真實之義。能悉深入無邊智海。

出生無量功德慧藏

〔疏〕文中初明教道。能悉已下。證道。出生已下。二道之益。

○第七明所行無礙。觀察如來生在世間。不爲世法所礙。功德顯示如來所化之中。無高下礙。故次明之。謂世八風不能拘礙。故親光名降魔功德。謂色等境不能亂故。

恒以佛日普照法界。隨本願力常現不沒。恒住法界。住佛所住。無有變異。於我我所俱無所著。住出世法。世法無染。

疏文中。以佛身日普照法界。則橫無礙。常現不沒。則豎無礙。不以無信生盲等而不現故。正顯入風不礙。恒住已下。顯無礙因。無有變異。示無礙相。如摩尼珠。不隨物變。不著我所。於內無礙。世法不染。於外無礙。由住出世。如蓮華故。如有頌云。諸佛常游於世間。利樂一切有情類。入法勢風邪分別。不能傾動不拘礙。鈔不以無信等而不現者。卽第一迴向中意。如有頌云。卽無性論

○第八明其所安立不可思議。卽觀察如來安立正法功德。由依前方便。能作饒益之事。故次明之。謂十二分教。各所安立。由深廣故。不可思議。

於一切世間建智慧幢。其智廣大。超過世間無所染著。拔諸衆生。令出淤泥。置於最上智慧之地。所有福德。饒益衆生。而無有盡了。知一切菩薩智慧。信向決定。當成正覺。以大慈悲。現不可說無量佛身。種種莊嚴。以妙音聲。演無量法。隨衆生意。悉令滿足。

〔疏〕文中分二。初約所詮以辨深廣。後約能詮以明深廣。今初。初句總顯。建卽安立。其智下釋。超世廣大。卽是幢義。拔置智地。卽是建義。所有已下。福智相對。明高廣義。二以大慈下。現身說法。約能詮教以明安立。

○第九明游於三世平等法性。卽觀察如來授記功德。以上加行利有情事。三世諸佛皆悉平等。故次明之。謂於三世平等性中。能隨解了。過去未來曾當轉事。皆如現在而授記。故下經云。普見三世。

於去來今心常清淨。令諸衆生不著境界。恒與一切諸菩薩記。令其皆入佛之種性。生在佛家。得佛灌頂。疏文中初明三世平等之義。故云心常清淨。自得平等。令物不著。使他平等。恒與以下。正明授記。授記未來。令同過去種性。亦名平等。

○第十明其身流布一切世間。卽觀察如來於一切世界示現受用變化身功德。顯上利益。一時頓徧。非次第作。故次明之。

常遊十方未曾休息。而於一切無所樂著。法界佛刹悉能徧徃。諸衆生心靡不了知。所有福德離世清淨不住生死。而於世間如影普現。

〔疏〕文中初通辨二身。常約豎窮。徧約橫廣。十方法界。綺互其文。後諸衆生心下。總顯現相。德無不淨。故不住生。成機無不鑒。故普現世間。

○第十一明於一切法智無疑滯。卽觀察如來斷

疑功德。以於上十方彼彼之處。作斷疑事。故次明之。謂於諸境善決定故。故下經云。智。恒。明。達。一切諸法。

以智慧月。普照法界。了達一切悉無所得。恒以智慧知諸世間。如幻如影。如夢如化。一切皆以心爲自性。如是而住。隨諸衆生業報不同。心樂差別。諸根各異。而現佛身。如來恒以無數衆生而爲所緣。爲說世間皆從緣起。知諸法相皆悉無相。唯是一相。智慧之本。欲令衆生離諸相著。示現一切世間性相而行於世。爲其開示無上菩提。

〔疏〕文中初自斷疑。非不自決。能斷他疑故。智月普照。總明了境。了達無得。是了真境。非不證真。能了俗故。恒以智下。明了俗境。一切皆以心爲自性。義通二境。攝境爲心。是世俗勝義。心之自性。卽是真如。是勝義勝義。如是而住。以無所得而爲方便。雙照真俗。無住住故。菩薩智光月。法界以爲輪。游於畢竟空。世間靡不現。亦可屬上。現受用身。二隨諸已下。能斷他疑。初明隨機現身。如來已下。所斷疑境。爲說緣起。是斷疑法。深入緣起。疑見亡故。知緣起無性故。知法無相。無相無異。故名一相。智體理。

成故爲其本。鈔深入緣起者淨名三深入緣起斷諸邪見有無二邊無復餘習寶積偈云說法不有亦不無以因緣故諸法生故由見因緣能斷疑故後欲令下。正明斷疑若離相著。開示菩提疑方斷故。

○第十二明於一切行成就大覺卽觀察如來令入種種行功德。由所化生性有差別故次明之。謂八種種行皆成大覺。下經但云了了一切行

爲欲救護一切衆生出現世間開示佛道令其得見如來身相攀緣憶念勤加修習除滅世間煩惱之相修菩提行心不散動於大乘門皆得圓滿成就一切諸佛義利

疏文中初約說法令入開示佛道者。令悟入故。後令其下。約現身令入攀緣修習。是進善行。除滅已下。是離惡行。修菩提行。總舉萬行。心不散動。卽是入義。旣萬行齊修。則因無不滿。果無不成。

○第十三明於諸法智無有疑惑。卽觀察如來當來法生妙智功德。由卽於前所化有能無能。善巧別知。故次明之。謂聖聲聞言。此人全無少分善根。如來知彼善法。當生現證。過去微少善根。種子所隨。故

悉能觀察衆生善根。而不壞滅清淨業報。智慧明了。

普入三世

〔疏〕故文云。悉能觀察。下經云。盡一切疑。如求度者。遠劫採薪。興一善念。佛便知故。觀已便化。故不壞其清淨業報。智慧已下。釋其所以。以智普入。無不知故。故親光名爲能隨所應。恒正教誨功德。謂於諸法懷疑惑者。無有堪能。隨應教誨。唯佛能故名智慧明了。則第十一是自斷疑。此斷他疑。鈔如求劫採薪者。卽大莊嚴論第九。因說供養聲聞。得無量福。何況如來。便引此緣。昔有一人。因緣力故。發心出家。乃至僧坊。值佛不在。諸身子所。身子觀其無少善根。請諸比丘。比丘先問誰不度。汝云。舍利弗。如是展轉。皆不度之。如來大慈。至僧坊門。爲說得云。一切種智身。大悲以爲體。佛於三界中。見諸

受化子猶如牛求犢。夢念無休息。以手摩頂。其人悲泣。具說不度。因緣。佛說得云。身子舍利弗者。彼非一切智。亦不解體性。不盡知中下。彼識有齊限。不能深解了。無有智能。知微細之業報。遂牽入僧坊。與度得道。身子問云。我觀此人。無少善。因云。何與度。便得道耶。佛言。汝智微淺。此人過去無量劫前。爲一貧人。入阿蘭若山林。取薪爲虎所逼。以怖畏。故稱南無佛。種子今熟。故吾度之。得羅漢耳。故上云。微少善根。種子所隨。則第十。一者。若準無性。世親皆十一。斷他疑。今順親光。故爲此說。

○第十四明凡所現身不可分別。下經但云無能測身。卽觀察如來。如其勝解。示現功德。由上云。善巧別知。故此次云。於前所化邪正及俱行中。無有分別。

永離一切世間分別。放光明網。普照十方一切世界。

無不充滿。色身妙好。見者無厭。以大功德智慧神通。出生種種菩薩諸行。諸根境界自在圓滿。作諸佛事。作已便沒。

疏文中初二句明無分別義。世虛妄解。種現俱亡。故云永離。由自無分別故。餘不可以分別知。故親光名爲能正攝受。無染自體。殊勝功德。謂佛身功德。非是雜染分別所起。無煩惱業生之雜染。故不可分別。而無性云。隨機現身。如摩尼珠。無分別者。則順今文佛無分別。不順彼經不可之言。次放光明下。彰所示現皆無分別。見無厭足。則顯衆生不

能分別如瞿波觀佛毛孔。念念無厭。不能窮究。故
鈔如彼瞿波觀佛毛孔。即七十五經。以大功德下。辨能現德。出生已
下。明所現益。諸根以下。辨所現相。謂諸根圓滿。境
界自在。作諸佛事。總彰現意。作已。便沒。明現時分。
既隨勝解現。則感謝應移。

○第十五明一切菩薩等所求智。即觀察如來無
量所依。調伏有情。加行功德。為欲引發。任持不
定種性。聲聞菩薩。唯讚大乘。故次明之。言等所
求者。無不求故。佛地名為正所求智。謂唯菩薩
正能求故。鈔言等所求下。是疏釋經義在釋文。

善能開示過現未來一切智道爲諸菩薩普雨無量陀羅尼雨令其發起廣大欲樂受持修習

〔疏〕文中初明所求卽一切智此所求智卽是無量菩薩所依而言道者通因果也爲諸已下卽成所依義謂由無量菩薩爲欲調伏諸有情故發起加行要以佛增上力故聞法爲先獲得妙智而爲所依令其發起廣大欲樂者卽是調伏有情加行受持修習者卽成智之因

○第十六明得佛無二任勝彼岸卽觀察如來平等法身波羅密多成滿功德爲遮所化於大師

所疑一切智非一切智。故次明之。由滿諸度是
一切智。言無二者。卽平等也。平等有二。一法身
平等。於法身中滿諸度故。二果位諸度無增減
故名爲平等。親光則以住於法身。卽是彼岸。不
說諸度。故云法身無差別相。名爲無二。緣彼勝
定。常住其中。故名爲住。卽無一住。各勝彼岸。佛
已窮到。故名爲得。

成就一切諸佛功德。圓滿熾盛。無邊妙色。莊嚴其身。
一切世間靡不現覩。永離一切障礙之法。於一切法
真實之義。已得清淨。於功德法而得自在。

〔疏〕文中初滿諸度。故云熾盛。次無邊下。以度滿故。莊嚴法身。故法華云。微妙淨法身。具相三十二。以八十種好用莊嚴法身。以十身圓融。不相離故。言一切世間者。不隔凡聖。靡不現觀。雙現受用變化之身。永離已下。無二礙故。和合識破。相續心滅故。於一切下。顯現法身。智純淨故。於功德下。諸度滿故。鈔和合識破。即起信意。前文已有下復重明。

○第十七明不相間雜。如來解脫妙智究竟。即觀察如來隨其勝解。示現差別佛土功德。以外人聞上平等。謂同一性。故次說言。不相間雜。謂一

切如來。十身體用。各各別故。猶如冥室千光。

爲大法王。如日普照。爲世福田。具大威德。於一切世間。普現化身。放智慧光。悉令開悟。欲令衆生知佛具足無邊功德。以無礙繒繫頂受位。隨順世間方便開導。以智慧手安慰衆生。爲大醫王。善療衆病。一切世間無量國土。悉能徧徃。未曾休息。清淨慧眼。離諸障翳。悉能明見。於作不善惡業衆生。種種調伏。令其入道。善取時宜。無有休息。若諸衆生起平等心。卽爲化現平等業報。隨其心樂。隨其業果。爲現佛身。種種神變。而爲說法。令其悟解。得法智慧。心大歡喜。諸根踊

躍見無量佛起深重信生諸善根永不退轉

〔疏〕在文分二。初明變化身土不雜。二明受用身土不雜。無著但云差別佛土畧舉一邊。親光則雙明身土合今文意。今初變化中。先身後土。初中先總顯化身超勝。次普現者。通十法界身。放智慧光。合如日義。欲令已下彰所化意。能爲多化。方顯佛德無邊。所以名不間雜者。以於一切世間普化。一佛既爾。餘何所化。故知所屬不同。重重皆徧。是不間雜義。鈔所以名不間雜下。隨難別釋。卽是釋經於中先問後故。知所屬不同。下釋所屬不同。卽無雜義。如千燈各異。重重皆徧。是無間義。如光光涉入。故上總言。如冥室千光。後以無礙

下。別化因圓果滿之身。初明因圓。爲大醫下。現果
滿身。二一切世下。明現化土。初明非唯能化。亦能
徧往。清淨慧下。明佛觀機。卽是如來勝解現前。於
作不善下。隨機現土等。隨諸衆生。應以何國起調
伏心。入佛智慧。而取佛土。故云善取時宜。無適淨
穢。故云種種。欲該餘化。畧無土言。義必含有。又對
後平等。但言不善。亦應合有有漏之善。二若諸衆
生下。現受用身土不雜。先土後身。已證真如。名平
等心。觀受用上。是平等報上。則心有高下。此則依
於佛慧。上則心有高下。卽淨名經意。螺髻語。舍利
弗。仁者心有高下。不依佛慧。故見此上。爲

不淨耳。今指上化土。是隨心。高下。今見受用。是依佛慧。後隨其心樂下。現受用身。故親光云。於淨佛土。現受用身。亦不相雜。今其已下。明現之益。親光云。大集會中。現種種身。與諸菩薩受用法樂。亦不相雜。得智心喜等。皆法樂也。又心大歡喜。卽是初地。見諸佛。故生歡喜等。以證生信。故名深重。以證不退。故得永言。

○第十八明證無中邊佛平等地。卽觀察如來三種佛身。方處無分限功德。由疑上如來妙智。究竟非一非異。其相云何。故次明此無中邊等。常無常等。皆二邊相。言方處者。謂諸世界。無分限。

者。釋無中邊。此無中邊。畧有四義。一世界無中邊。佛德如彼。無有分限。二世界無邊。諸佛十身。卽於其中。稱世界量。平等徧滿。三此法身等於佛地中。平等徧滿。無中無邊。無有分限。四此法身等。徧一切處。爲諸衆生現作饒益。然非自性無中無邊。親光復名此爲真如。相殊勝功德。謂真如相。無有中邊。如此真如。卽是佛地平等法性。證此性故。徧知一切。於中不染。今此文中。總顯十身。皆無分限。

一切衆生隨業所繫。長眠生死。如來出世能覺悟之。

安慰其心使無憂怖若得見者悉令證入無依義智。智慧善巧了達境界莊嚴妙好無能映奪。智山法芽悉已清淨。或現菩薩。或現佛身。令諸衆生至無患地。無數功德之所莊嚴。業行所成。現於世間。一切諸佛莊嚴清淨。莫不皆以一切智業之所成就。

[疏]文中分二。先別顯四智十身。後無數下。總結因果。今初先就覺他。翻明白覺。成就法身。於中先明覺他。卽妙觀察智。及成所作智之所利樂。若得見下。彰其所益。無依義智。卽大圓鏡。是無中邊。佛平等地。以無礙智身。無所依故。則證真如爲佛地性。

轉昔染依爲智所依。卽是如如。及如如智。旣令他
證顯自己證也。次智慧下二句。卽妙觀察智。莊嚴
無奪。顯圓鏡智所現之影。智山清淨。卽平等性智。
平等高出。所以名山。四惑已亡。故云清淨。因惑爲
種。生必待時。今能生自在。故種受芽稱。或現已下。
卽平等性所現之影。兼顯十身。不唯此二。故復言
或。令諸衆生至無患地者。卽成佛地。以遠離微細
念故。名爲無患。後總結中。初總明。謂十力四智等。
莊嚴法身。業行所成。卽是報佛。現於世間。結他受
用。及變化身。總上諸義。則有十身。鈔總上諸義者。一就覺他翻明。

自覺是菩提身。二成就法身。及顯如如。卽法身。三
四智。卽智身。四莊嚴妙好。卽相好莊嚴身。五無能
映奪。卽威勢身。六無數功德。卽福德身。七或現菩
薩等。卽意生身。八令生離惑。卽是願身。及九變化
身。十業行所成。現於世。一切已下。總結異因。同歸
一智。謂智導萬行。故能證此佛平等地。若報若化
無不清淨。

○第十九明極於法界。卽觀察如來窮生死際。常
現利益安樂。一切有情功德。以上言無中邊相。
云何無相。故次云極於法界。謂此法界最清淨
故。離諸戲論。是法界相。能起等流利益之事。極
此法界。無有盡期。親光亦名此德爲證得果相。

殊勝功德。謂此窮於清淨法界。如是法界。修道得故。以斯則極法界言。有於二義。一同法界常故。二同法界清淨故。

常守本願。不捨世間。作諸衆生堅固善友。清淨第一離垢光明。令一切衆生皆得現見。六趣衆生無量無邊。佛以神力常隨不捨。若有往昔同種善根。皆令清淨。而於六趣一切衆生。不捨本願。無所欺誑。悉以善法方便攝取。令其修習清淨之業。摧破一切諸魔鬪諍。

疏文中先明常利樂。一廣利樂。今初常守本願者。

謂本發心。法界生界若有盡。我願乃盡。今生界未窮。故常現利樂。作善友者。世之善友。畧有七事。一遭苦不捨。二貧賤不輕。三密事相告。四遮相覆藏。五難作能作。六難與能與。七難忍能忍。如來亦爾。爲物隨於六趣。苦而不捨。貧無法財。而不見輕。本性客塵。無不相告。善根未熟。則以權覆實。堪真實化。則以實覆虛。著弊垢衣。執除糞器。爲難作能作。解髻明珠。爲難與能與。生違佛化。乃至多劫。心無退動。爲難忍能忍。無不究竟。方明堅固。次清淨已下。明同法界清淨。雖復常化。離能所相。故名第一。

二六趣下。廣多不捨。次若有已下。不捨昔緣。次而於下。通顯不捨。若暫不隨。則捨本願。如願能作名不欺誑。次悉以下。彰攝巧益。令同法界清淨。摧魔惑故。

○第二十顯於二句。謂盡虛空性。窮未來際。卽觀察如來無盡等功德。謂上利樂皆無盡故。深密佛地。具斯二句。開則別中自有二十一。句。下離世間。但云等虛空界。而無窮未來際。欲顯圓數。故親光亦云。次後二句。顯示世尊無盡功德。初句自利。後句利他。故云謂如虛空。經成壞劫。性

常無盡如來一切真實功德亦復如是如未來
際無有盡期利他功德亦復如是而無著釋但
云無盡功德等不言開合世親無性開此等字
爲究竟功德故皆云等言等取究竟功德則以
無盡功德釋初句究竟功德釋後句而無性意
後句是究竟無盡與前無盡異者前則橫論無
盡故云盡一切界徧作有情諸饒益事後句則
豎顯無盡故云顯佛功德永無窮盡所化有情
永無盡故同顯無盡故二句合自他等異二句
則開今文意合欲顯二利不相離故窮未來際

通在極於法界。及盡虛空故。

從無礙際。出廣大力。最勝日藏。無有障礙。於淨心界。而現影像。一切世間。無不覩見。以種種法。廣施衆生。佛是無邊。光明之藏。諸力智慧。皆悉圓滿。恒以大光。普照衆生。隨其所願。皆令滿足。離諸怨敵。爲上福田。一切衆生。共所依怙。凡有所施。悉令清淨。修少善行。受無量福。悉令得入。無盡智地。爲一切衆生。種植善根。淨心之主。爲一切衆生。發生福德。最上良田。智慧甚深。方便善巧。能救一切。三惡道苦。

〔疏〕爲順二論文。分爲兩初。唯橫論無盡。正明盡虛。

空性。二爲上福田下。雙約橫豎以顯無盡。兼明窮
未來際。今初先二句總言無礙際者。卽法身智身。
如彼虛空。無有障礙。無邊無際。無盡無減。無生無
滅。無有變易。名無礙際。而能現前作諸利樂。如彼
虛空。容受質礙。故云出廣大力。次最勝日下。別顯
依空無礙之用。畧舉一日。而有四德。一蘊藏千光。
二百川現影。三有目皆覩。四生成萬差。名種種施。
上一段文。言合法喻。佛是已下。唯就法說。初光明
藏。卽上日藏。身智光明。含攝出生故。諸力已下。如
日無缺。恒以大下。如日舒光。離諸魔敵。降老死冤。

如日大明衆景奪耀不獨合上故文有影畧鈔降

怨者淨名云譬如勝怨乃可爲勇如是兼除老病歿者菩薩之謂也今借用之二雙約橫

豎論無盡者但云一切通於十方及來際故文中

先明爲生福智之田上福田者具前德故凡所有

下釋上田義三義名上一令清淨如無荒穢二因

少果多如涅槃說純陀施福三入無盡智如田隨

種隨生如穀展轉無盡成金剛種終不銷故具斯

三義稱曰上田次爲一切下顯爲田主次爲一切

衆生發生下明體卽是田後智慧下明能爲田義

具悲智故初權實無二總爲一智對下能救悲智

無礙。合爲一心。則是如來最清淨覺。

鈔則是如來最清淨覺者。

以在最後故復結之。句句亦皆合結也。如涅槃說者。經云。我今所供。雖復微少。佛令汝具足。檀波羅密。爲果。

上所引功德之名。全依無著。其所解釋。多

依無性有不同者。亦已對決。與離世間品。小有同

異。大旨無違。至下品中。當更顯示。依上所釋。文旨

有據。德相可分。若列宿羅空。粲然不雜。豈得寬文。

廣申辭句。於佛勝德。蔑然畧陳。幸諸後學。不咎其

繁而不要也。別觀德相二十段竟

○第三結成觀解

如是信解。如是觀察。如是入於智慧之淵。如是遊於

功德之海。如是普至。虛空智慧。如是而知衆生福田。如是正念。現前觀察。如是觀佛諸業相好。如是觀佛普現世間。如是觀佛神通自在。

〔疏〕謂前諸德。不出內德及與外相。今初二句。總明能觀信解。約於仰推。觀察通於諸眼。後之八句。就所觀德。以辨能觀。前四內德。後四外相。前中謂佛內德無量。不出福智。前二福智之體。智慧之淵。畧語其深。功德之海。義兼深廣。淵宜趣入。海宜游涉。次二句。福智之用。智廣虛空。福無不益。稱此而了。名普至知。後四外相。中初一句。重舉能觀。揀內外。

故言正念者。明非散心。了佛德相。唯心無性。靜而
 能鑒。復云觀察。後三句。亦就所觀以辨能觀。初一
 句總。後二句別。身雲普現。卽是相好。神通自在。卽
 前業用。前二十一德中。或一句之內。言兼福智。一
 德之內。體用雙明。若別配屬。義成偏近。鈔若別配屬者。正彈
 古德。以後十結句。科上二十一德之經。彼云。然此
 所現佛法界身。豈有限量。今且依下結文。分爲十
 門。於中二。先顯十門之德。後如是下。正結十門之
 名。前中卽爲十段。然按後結。少不次第。從初至清
 淨善根。已來。超明第十。見佛示現。不可思議。自在
 神力。門彼約晉經。與今小異。恐尋不曉。會取今經
 今經。卽至功德善根。悉已清淨。爲第一段。神通自
 在。第二段。已去。全依今經。謂第二段。從色相。第一下。却
 明第一。如是信解門。第三。獲一切智。放大光下。第
 二。觀察正覺門。第四。示現色身。不思議下。明入智

慧淵門第五。恒以佛日普照法下。第四入功德海門第六。以大慈悲現不可說無量佛身下。明第七正念現前觀察門第七。以智慧月下。明第五。至虛空智慧門第八。放光明網普照十方下。即第八。觀察如來諸業相好門第九。為大法王。如日普照下。却明第六。如是而知衆生福田門第十。清淨第一。離垢光明下。却明第九。如是觀佛普現世間門。釋曰。此即賢首解為十門。以其總名收其別義。皆不盡理。故云偏近。况結中。不出內德。外相。內德不出。福智如何。攝得前文。又刊定記科為十六三業。而段段之中。三業多闕。亦消文不盡。故皆偏近。依今之釋。一句無遺矣。

○第二明見佛光用。前雖有用。乃觀如來常所具德。今現目覩。故不同也。文中三初觀常光。二觀放光。三顯光意。今初。

時彼大衆見如來身一一毛孔出百千億那由他阿

僧祇光明。一一光明。有阿僧祇色。阿僧祇清淨。阿僧祇照明。令阿僧祇衆觀察。阿僧祇衆歡喜。阿僧祇衆快樂。阿僧祇衆深信增長。阿僧祇衆志樂清淨。阿僧祇衆諸根清涼。阿僧祇衆恭敬尊重。

〔疏〕雖云毛出。意取常出。有十一句。初總餘別。前三光相。後七光益。

○二觀放光中

爾時大衆咸見佛身放百千億那由他不思議大光明。一一光明。皆有不思議色。不思議光。照不思議無邊法界。以佛神力。出大妙音。其音演暢百千億那由

他不思議讚頌超諸世間所有言詞出世善根之所成就復現百千億那由他不思議微妙莊嚴於百千億那由他不思議劫歎不可盡皆是如來無盡自在之所出生又現不可說諸佛如來出興於世令諸衆生入智慧門解甚深義又現不可說諸佛如來所有變化盡法界虛空界令一切世間平等清淨如是皆從如來所住無障礙一切智生亦從如來所修行不思議勝德生復現百千億那由他不思議妙寶光燄從昔大願善根所起以曾供養無量如來修清淨行無放逸故薩婆若心無有障礙生善根故

〔疏〕先舉體相。後以佛下辨光業用。文有五現。一說法。二現嚴。此二皆先現後因。三現佛。則先現後意。令成教證。二甚深故。四現神變。五現寶燄光。皆先現後因。

○第三現光意

爲顯如來力廣徧故。爲斷一切衆生疑故。爲令咸得見如來故。令無量衆生住善根故。顯示如來神通之力。無映奪故。欲令衆生普得入於究竟海故。爲令一切諸佛國土菩薩大衆皆來集故。爲欲開示不可思議佛法門故。

〔疏〕竝顯可知

○第二大科明現勝德之意。文分二別。先牒前現德。

爾時如來大悲普覆。示一切智所有莊嚴。

〔疏〕悲爲能現。智爲所現者。影畧其文。應以依二嚴體現。二嚴德。

○二正明現意。分二。先明下益衆生。二開示如來下。明上弘佛道。今初。

欲令不可說百千億那由他阿僧祇世界中衆生。未信者信。已信者增長。已增長者。令其清淨。已清淨者。

令其成熟。已成熟者。令心調伏。觀甚深法。具足無量。智慧光明。發生無量廣大之心。薩婆若心。無有退轉。不違法性。不怖實際。證真實理。滿足一切波羅蜜行。出世善根。皆悉清淨。猶如普賢得佛自在。離魔境界。入諸佛境。了知深法。獲難思智。大乘誓願。永不退轉。常見諸佛。未曾捨離。成就證智。證無量法。具足無邊福德藏力。發歡喜心。入無疑地。離惡清淨。依一切智見法不動。得入一切菩薩衆會。常生三世諸如來家。世尊所現。如是莊嚴。皆是過去先所積集善根所成。爲欲調伏諸衆生故。

疏分二。先彰現益。今初舉所益。後未信下。辨益不同。然此益中。文含多勢。且依一判。先約行布。初五句。十信。始自初信。令心調伏。信位滿故。次七句。皆十住益。謂初二句。是住中觀慧。次二句。下化上求之心。後三句。住中證入。知心自性。故曰不違不退。二乘。故不怖實際。不由他悟。是證實理。圓教十住。許入證故。三滿足。下三句。十行益。初句。位中之行。後二句。位中之德。四離魔。下三句。十向益。初句。起行。一向利他。離二乘等魔。迴向菩提。故入佛境。次句。得法隨。相離相。無礙難思。後句。行成。五常見諸。

佛下。盡明十地。初四句皆歡喜地。一見受用身故。稱曰常。二根本證真。後得證無量法。又證徧行真如。亦名無量。三則僧祇積福。證理出生。名福藏力。四發歡喜心。是此位名。入見道故。名無疑地。離惡清淨。是第二地。依一切智。見法不動。是三四地。得入一切菩薩衆會。是五六七地。常生佛家。八地已上。念無有間。故曰常生。若約圓融。初之五句。信中攝位。句各一位。如理思之。鈔句各一位者。初信位。是行位。四成熟。是向位。五調伏。是地位。從觀甚深下。義通諸位。以圓教中。位位攝德故。二世尊下。辨現因。既積善所成。

故爲益深大。爲欲調伏諸衆生故。一句。文含二勢。一結前。謂結因所屬。二生後。生後開示。亦是爲生。

○第二明上弘佛道

開示如來大威德故。照明無礙智慧藏故。示現如來無邊勝德極熾然故。顯示如來不可思議大神變化。以神通力。於一切趣現佛身故。示現如來神通變化無邊際故。本所志願悉成滿故。顯示如來勇猛智慧能徧徃故。於法自在成法王故。出生一切智慧門故。示現如來身清淨故。又現其身最殊妙故。顯示證得三世諸佛平等法故。開示善根清淨藏故。顯示世間

無能爲喻。上妙色故。顯示具足十力之相。令其見者無厭足故。爲世間日照三世故。自在法王一切功德。皆從往昔善根所現。一切菩薩於一切劫。稱揚讚說。不可窮盡。

〔疏〕文中分二。先別彰所爲。有十七句。爲欲顯前二。十一種殊勝功德。初句爲總。餘皆是別。於中前五。各攝二德。餘句各一。第一照明無礙。智慧藏句。顯二德者。一顯不二現行。故云無礙。無二礙故。二顯趣無相法。故云照智慧藏。慧爲能照。藏卽所照。無相真如。照明趣達。眼目殊稱。第二句。一顯住於佛。

住。謂任空大悲。任運利樂。無休息時。名曰熾然。二顯逮得一切佛平等住。謂依清淨智起利樂意。作二身業。皆熾然故。第三句。一顯到無障處。二顯不可轉法。謂此二是降魔伏外功德。前由有對治。則不爲他動。今由有神變。乃能轉他。第四句。一爲顯所行無礙。今徧趣現身。卽是所行。有漏盡通。八風不染。又神通力。卽能徧因。二顯其所安立不可思議。謂佛威神所建立故。第五句。初顯游於三世平等法性。約記三世事。亦是神通。無邊際言。卽平等性。二顯其身流布一切世間。此言甚顯。下皆各攝。

一德六顯於一切法智無疑滯。本願已滿故七顯於一切行。成最正覺。名智徧往。八顯於諸法智無有疑惑。名於法自在。九顯一切菩薩等所求智。十顯凡所現身不可分別。十一爲顯得佛無二。住勝彼岸。彼岸已圓。十身殊妙故。十二顯不相間雜。如來解脫妙智究竟功德。又諸佛平等皆徧而不相雜故。十三顯證無中邊佛平等地。平等之地。卽清淨藏。十四顯極同法界。故云土妙。十五有十力故。能盡虛空。見者無厭。十六窮未來際。故照三世。第二自在下。舉因結歎。前舉積因。後歎無盡。

五觀佛勝德竟

○第六天王請佛處殿

爾時兜率陀天王奉為如來嚴辦如是諸供具已。與百千億那由他阿僧祇兜率天子。向佛合掌白佛言。善來世尊。善來善逝。善來如來。應正等覺。唯見哀愍。處此宮殿。

疏亦稱五號。竝曰善來。及下文意。皆如第三會說。

鈔亦稱五號者。一。世尊。二。善逝。三。如來。四。應供。五。正徧知。然尋常畧舉下三。今加上二。故為五德。

○第七如來受請

爾時世尊。以佛莊嚴。而自莊嚴。具大威德。為令一切

衆生生大歡喜故。一切菩薩發深悟解故。一切兜率陀天子增益欲樂故。兜率陀天王供養承事無厭足故。無量衆生緣念於佛而發心故。無量衆生種見佛善根福德無盡故。常能發起清淨信故。見佛供養無所求故。所有志願皆清淨故。勤集善根無懈怠故。發大誓願求一切智故。受天王請入一切寶莊嚴殿。如此世界十方所有一切世界悉亦如是。爾時一切寶莊嚴殿自然而有妙好莊嚴。出過諸天莊嚴之上。一切寶網周布彌覆普雨。一切上妙寶雲普雨。一切莊嚴具雲普雨。一切寶衣雲普雨。一切栴檀香雲普雨。

一切堅固香雲。普雨一切寶莊嚴蓋雲。普雨不可思議華聚雲。普出不可思議妓樂音聲。讚揚如來一切種智。悉與妙法而共相應。如是一切諸供養具。悉過諸天供養之上。

〔疏分二〕先受請入殿。二爾時一切下。入已現嚴前中。先明此界。後辨結通。前中初一句。明能應之德。次明所爲之意。三正受請。並顯可知。第二現嚴顯是佛力。故出過諸天。

○第八天王獲益

時兜率宮中。妓樂歌讚熾然不息。以佛神力。令兜率

王心無動亂。往昔善根皆得圓滿。無量善法益加堅固。增長淨信。起大精進。生大歡喜。淨深志樂。發菩提心。念法無斷。總持不忘。

〔疏〕文中初得定益。往昔已下。是進善益。佛神力言。通此二益。十住位劣。攝散歸靜。故樂音止息。此位超勝。得動實性。故動寂無二。熾然音樂。心不動也。○第九承力偈讚。然憶念昔因。亦是益相。取文便故。爲說偈依。文中二。先明此處偈讚。後結通十方。前中先說偈依。

爾時兜率陀天王。承佛威力。卽自憶念過去佛所。

種善根而說頌言

○後正陳偈讚

昔有如來無礙月

諸吉祥中最殊勝

彼曾入此莊嚴殿

是故此處最吉祥

昔有如來名廣智

諸吉祥中最殊勝

彼曾入此金色殿

是故此處最吉祥

昔有如來名普眼

諸吉祥中最殊勝

彼曾入此蓮華殿

是故此處最吉祥

昔有如來號珊瑚

諸吉祥中最殊勝

彼曾入此寶藏殿

是故此處最吉祥

昔有如來論師子

諸吉祥中最殊勝

彼曾入此山王殿

是故此處最吉祥

昔有如來名日照

諸吉祥中最殊勝

彼曾入此衆華殿

是故此處最吉祥

昔有佛號無邊光

諸吉祥中最殊勝

彼曾入此樹嚴殿

是故此處最吉祥

昔有如來名法幢

諸吉祥中最殊勝

彼曾入此寶宮殿

是故此處最吉祥

昔有如來名智燈

諸吉祥中最殊勝

彼曾入此香山殿

是故此處最吉祥

昔有佛號功德光

諸吉祥中最殊勝

彼曾入此摩尼殿

是故此處最吉祥

〔疏〕十頌。頌各一佛。佛名有異。畧無別德。餘同前會。此佛卽前會十佛次前十佛。寄位漸深。憶念漸遠耳。

〔論〕云吉祥者。衆善所集。名吉。衆福所加。名祥。云金色殿者。殿有金色。光明亦明。法身無垢。云蓮華殿者。殿有衆色。蓮華莊嚴。亦表法身無染。是蓮華義。山王殿者。明積德如山王。非殿有山。如經云寶者。貴德爲寶。非關寶玉餘義可知。所以須歎往昔如

來者有三義。一兜率天王念昔自分善根力。二明古今諸佛道跡。普周三明如來道跡。依古不異。非天魔梵所爲。令衆生生信入故。此十佛亦以加行隨行成名。

如此世界兜率天王承佛神力。以頌讚歎過去諸佛十方一切諸世界中兜率天王。悉亦如是歎佛功德。

○第十如來就座

爾時世尊於一切寶莊嚴殿摩尼寶藏師子座上結跏趺坐。法身清淨。妙用自在。與三世佛同一境界。住一切智。與一切佛同入一性。佛眼明了。見一切法皆

無障礙。有大威力。普遊法界。未嘗休息。具大神通。隨
有可化衆生之處。悉能徧往。以一切諸佛無礙莊嚴
而嚴其身。善知其時。爲衆說法。不可說諸菩薩衆。各
從他方種種國土。而共來集。衆會清淨。法身無二。無
所依止。而能自在起佛身行。坐此座已。於其殿中。自
然而有無量無數殊特妙好。出過諸天供養之具。所
謂華鬘。衣服。塗香。末香。寶蓋。幢幡。妓樂。歌讚。如是等
事。一一皆悉不可稱數。以廣大心。恭敬尊重。供養於
佛。十方一切兜率陀天。悉亦如是。

疏文分四別。一明就座。二顯德。亦大同前二十一

德恐厭繁文。不能具釋。三衆集。卽眷屬圓滿。然後品衆集有所表故。但云一萬理實徧集。故此但云不可說衆。未必但是後品之人。四現嚴。初此界後結通。

論於此品末。有十三行半經。約分爲二段。一爾時世尊已下。至爲衆說法。有六行半經。明如來處座。爲衆說法分。二不可說諸菩薩衆已下。至悉亦如是。有七行經。明十方菩薩來集處座。殿內莊嚴妙好。勝出諸天。一切十方兜率。悉同此雲集莊嚴分。座體前已釋訖。師子座上結跏趺坐者。有二義。一

世間威儀。二會此十迴向中。理事交徹。如來座體。以法界緣起。不思議智。無所依住。大慈大悲。以爲座體。以無依住。智性自徧周。與虛空等。不去不來。而對現色身。與衆生數等。任根差別。隨應調伏。而化度之。而無所造作。如經云。法身清淨。妙用自在者。是也。與三世佛同一境界。住一切智者。以智體無內外中邊。諸佛同住。境界亦爾。與一切佛同入一性者。爲無性之性。無出入也。諸佛同此也。佛眼明了者。覺一切法。非有無。而能以智徧知一切諸法也。有大威力。普遊十方。未嘗休息者。以無作無

依之理智破一切邪見執著。皆悉消亡。名之爲威力。以智無表裏。性徧如空。應感現形。而無來去。省之爲遊。無俗不真。名爲法界。一念三世。古今情盡。教化衆生。無終無始。名未嘗休息。明時不遷也。具大神通者。大智無依無形。性無生滅。名之爲神。智無不達。名之爲通。隨有可化。悉能徧行者。智無去來。中邊表裏。十方衆生。應感皆見。皆悉不同。名之爲徧。徧徧以一切諸佛無礙莊嚴。而莊嚴之。有二義。一四無礙。智莊嚴。二依正。二報。二福。莊嚴。善知其時。爲衆說法者。了依生熟。如應化度。問曰。何爲諸

佛知衆生心。時與非時。答曰。諸佛如來心。與一切
衆生心。本不異故。是一心一智慧故。以此知時與
非時。諸佛悟而了。與衆生共之。衆生迷。自謂爲隔。
一切諸佛。以一切衆生心智慧而成正覺。一切衆
生迷。諸佛智慧而作衆生。及至成佛時。還成衆生。
迷理之佛。所說法門。還解衆生心裏迷佛衆生。以
此不異。故知衆生心。經云。不可說諸菩薩。各從他
方種種國土。而共來集者。約萬行差別。名爲他方。
以法隨根。應物調伏。各種種國土。不出如來大圓
明智。名爲而共來集。衆會清淨者。無情識也。法身

無二者。與佛同一體性。等無性也。無所依止。無得無證也。而能自在起佛身行者。無作之智。同佛用也。坐此座已。會此十迴向法界本也。殿出殊好。以智所感也。出過諸天者。以智報感。非有情爲也。論主頌解云。言菩薩所有報相約行所生。頌曰。菩薩以忍爲垂鬢。慚愧恒爲衣服飾。戒品塗香及秣香。慈悲普覆爲其蓋。正心不動禪定幢。智慧幢破諸邪見。方便常住生灰海。饒益衆生爲妓樂。總持演暢妙法音。聞者解脫爲歌樂。已上如文可知。此會所將如是大悲。如是智慧。如是萬行。但爲長養初發。

心住。初生佛家之智慧大悲。令慣習自在。故時亦不改。法亦不異。智亦不遷。猶如竹筭。依舊而成。初生與終。無有麤細。亦如小兒。長初生而爲大。無異大也。此直以十行十迴向十地。十一地。爲長養道之方便。佛果在於初發心。又十住中。一住具十住之功用。故及十住十行十迴向十地。十住中總具足故。猶如神龍馬王所生。其神駒生在其地。與父遲速相似。唯力用未如其父母。如初發心菩薩。以乘如來一切智乘。初生佛家。與佛同智。唯神通道力未如。以待大悲萬行長養。故雖長養功終。法不

異也。時不遷也。終不出初發心時。力用功畢。如龍女不出剎那際。一生成佛。如善財一生得佛果。亦爾。一生義者。得無生也。如三乘以意生身菩薩。未說乘佛一切智乘者。推佛果在十一地後。三祇之劫終也。前三賢爲資糧。十地爲見道。佛果在十一地。三祇之劫終也。如此教。與三乘中五位行相。一倍顛倒。行相不同。後當更明。

升兜率天宮品竟

大方廣佛華嚴經疏論纂要卷第四十五

福州護龍庵比丘尼寂覺寂行昭定昭
 光昭同慶寂德昭恒昭選昭謀昭奇
 昭默昭純昭乾心敬昭盛昭茂昭敬弟
 子鄭康祉謝姜使鄭楷官周騰官鄭梓
 同刻
 華嚴經升兜率天宮品疏論纂要第四
 十五卷伏願衆等入一乘之玄門資人
 天之淨福
 康熙二十二年九月 日華藏室謹題